

BH 14/3/15

DASAR EKONOMI MELAYU BAHARU

Badan ekonomi, pemikir Melayu perlu bersama gubal dasar



➔ Langkah pastikan capai matlamat sasaran, pelaksanaan beri kesan

Oleh Mohd Iskandar Ibrahim
mohd_iskandar@bh.com.my

▪ Kuala Lumpur

Kerajaan perlu membabitkan semua badan ekonomi dan pemikir Melayu dalam menggubal dasar ekonomi Melayu baharu bagi memastikan ia mencapai sasaran ditetapkan.

Naib Presiden Dewan Perniagaan Melayu Malaysia (DPMM), Datuk Rozman Isli, berkata pembabitkan pemegang taruh penting bagi memberi input dalam mengembalikan usaha pembangunan ekonomi Melayu ke landasan yang betul.

"Sudah, lama dasar membabitkan ekonomi Melayu tidak dikemas kini dan tiba masanya kerajaan berbuat demikian supaya usaha kerajaan meningkatkan ekonomi orang Melayu dapat dilaksanakan dengan berkesan.

"Bagaimanapun, usaha menggubal dasar baharu itu perlu membabitkan semua pemegang taruh berkaitan terutama golongan usahawan muda supaya dasar diwujudkan sesuai dengan keadaan semasa," katanya ketika dihubungi BH, semalam.

Dasar perlu sejajar

Kelmarin, Menteri Hal Ehwal Ekonomi, Datuk Seri Mohamed Azmin Ali, dilaporkan berkata, kerajaan akan menggubal satu dasar ekonomi Melayu baharu berteraskan pertumbuhan, menjamin kesaksamaan dan perkongsian kemakmuran, bagi mendepani cabaran ekonomi semasa.

Beliau berkata, dasar itu akan mencerminkan semangat inklusiviti dan nilai keadilan yang akan menyumbang kepada kekayaan untuk dikongsi bersama seluruh rakyat Malaysia berkonsepkan per-

kongsian kemakmuran.

Rozman berkata, dasar yang bakal digubal itu perlu sejajar dengan perkembangan ekonomi dan teknologi semasa terutama membabitkan Revolusi Perindustrian Keempat (IR 4.0).

Sambut baik usah kerajaan

"DPMM menyambut baik usaha kerajaan menggubal dasar baharu untuk orang Melayu tetapi apa yang ingin saya tekankan ialah dasar itu perlu sejajar dengan situasi ekonomi serta merangkumi pelbagai bidang," katanya.

Sementara itu, Presiden Gabungan Pelajar Melayu Semenanjung (GPMS), Alif Anas Md Noor, berkata

dasar baharu terbabit diperlukan bagi memperkasakan sistem ekonomi orang Melayu.

"Dasar baharu ini dilihat sebagai langkah memodenkan Dasar Ekonomi Baharu (DEB) bagi memastikan orang Melayu mendapat limpahan ekonomi yang lebih saksama.

"Dalam keadaan sekarang, dasar baharu ini penting untuk mengimbangi atau merapatkan jurang antara orang Melayu dan bukan Melayu selain melonjakkan aktiviti ekonomi negara," katanya.

Dasar ekonomi Melayu baharu jamin kesaksamaan



Laporan disiarkan BH semalam.

Sudah lama dasar membabitkan ekonomi Melayu tidak dikemas kini dan tiba masanya kerajaan berbuat demikian supaya usaha kerajaan meningkatkan ekonomi orang Melayu dapat dilaksanakan dengan berkesan"

Rozman Isli,
Naib Presiden Dewan
Perniagaan Melayu Malaysia